

續文獻通考

卅七之八

漢書門			
八	三	三	二
冊	架	函	號

內閣文庫			
九	四	三	漢
函	八	冊	書
架	冊	號	類

內閣文庫			
番號	漢	2431	
冊數	81 (13)		
函號	294	13	



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak



續文獻通考卷之三十七



淺草文庫

皇明進士雲間王圻纂輯

國用考 漕運上

宋

理宗時知安慶黃幹代撫州陳守奏復轉搬法疏畧曰國
 家綱運資以餉軍比年以來法紀弛壞非惟軍餉不繼
 抑亦公私受弊其未離岸有江水淺涸坐食糜費之弊
 其已離岸有監官侵虧船梢盜竊之弊而其既敗有攤
 賴平民之弊雖知其弊莫之能革且以江西一路言之
 如撫州建昌綱之折閱每以水道淺涸不能巨舟延引
 歲終而未能起隔歲之綱者一綱吏卒水手動數百計



續文獻通考 卷之三十一
又所招集並皆游手無賴之人自度官吏侵盜大數已
虧恣情極用無所顧忌估藉所償不能萬分之一官司
不免縱之攤賴平民侵削國本爲害不細今若於隆興
置轉搬倉一所每歲一路綱運水脚其費不貲取其所
費養水軍數百人命一武臣爲之長造數十巨艦部以
軍法責之轉輸近裏州軍止以小舟運載納之轉搬倉
却令水軍專一護送更往迭來不假召募綱紀素定部
分素嚴舟楫素具較之烏合嘗試實相萬萬如此則非
惟可以省官綱之折閱抑足以增國家之武備戢江湖
之群盜脫士大夫之罪戾免平民之攤賴是一變法而
群害悉去衆利並興矣

遼聖宗太平時燕地大饑戶部王嘉獻計造船使民諳海
事者漕粟以賑燕民水路艱險多至覆沒鞭笞榜掠民
怨思亂於是首殺王嘉以快衆忿

金

世宗大定初劉璣同知漕運司事奏言漕戶顧直太高虛
費官物宜約量裁損若減三之一歲可省官錢一十五
萬餘貫上是其言

章宗明昌六年三月以北邊糧運括群牧馳以銀五十萬
兩錢二十三萬六千九百貫以備支給銀五萬兩金器
一千八百兩金牌百兩銀盃八十兩絹五萬疋雜綵千
端衣四百四十六襲以脩賞勞

宣宗元光元年六月造舟運陝西糧由大慶關渡以抵湖
城

哀宗天興元年八月發丁壯五千人運糧以餉合喜合喜
時爲樞密使將兵應完顏思烈等自汝州急入援故餉
之

元

世祖中統四年詔北京運米五千石赴開平其車牛之費
並從官給 至元十三年遣瀘州屯田軍四千轉漕重
慶 二十二年增濟州漕三千艘役夫萬二千人初江
淮歲漕米百萬石于京師海運十萬膠萊六十萬石而
濟之所運三十萬石水淺舟不能達更以百石之舟運

用四人故夫數增多 二十九年開通惠河以郭守敬
領都水監初言水利有十一事其一欲道昌平縣白浮
村神仙泉過雙塔榆河引一畝玉泉諸水入城滙于積
水潭從東折而南入舊河每十里置一牐以時蓄洩帝
稱善復置都水監命守敬領之丞相以下皆親操畚鍤
爲之倡置牐之處往往於地中得舊時磚木人服其識
逾年畢工自是免都民陸輓之勞上悅賜名曰通惠
英宗至治三年江浙行省言鎮江運河全籍練河之水爲
上源漕運商販舟楫無不由此以供億前朝嘗濬此湖
瀦畜潦水若運河水淺開放練河一寸可添河水一尺
近年淤淺以致遍運不通乞加修治制可工畢又置湖

兵百人專任修理

順帝至正九年十一月漕運使賈魯建言便益二十餘事
其一曰京畿和糴二曰優卹漕司舊領漕戶三曰接運
委官四曰通州總治豫定委官五曰船戶困於壩夫海
糧壞於壩戶六曰疏濬運河七曰臨清萬戶府當隸漕
司八曰宜以宣忠船戶付本司節制 十五年江浙省
臣乞減海運以甦民困戶部定擬本年稅糧除免征外
其寺觀并撥賜田糧十月開倉盡行拘收其不敷糧撥
至元折中統鈔一百五十萬錠於產米處糴一百五十
萬石貯瀕河之地以聽撥運從之

皇明

太祖定鼎金陵凡四方貢賦各緣其所至入於江達於京
師及 成祖遷都於燕百官衛士仰需江南於是始議
立運法派爲二道一由江入海出直沽口由白河運至
通州謂之海運一由江入淮黃河至陽武縣陸運至衛
輝府由衛河運至薊州謂之河運

國初海運因元之故海運不給於是陸運以濟之陸之
勞蓋不減海之險也及會通河既浚於是有饋運而海
運乃罷遮洋海運猶不廢焉然饋運之初皆支運也既
而議者以爲軍民不便於是有兌運時支運纔四十之
一而故法幾廢矣蓋凡五變而小小損益不與焉其勢
然也 按五變一曰海運二曰海陸兼運三曰支運四

曰兌運五日改兌俱詳於後

太祖洪武二年令戶部於蘇州太倉儲糧二千萬石以備海運供給遼東 六年冬十二月浚開封漕河明年春轉漕粟于陝西 十三年海運糧七十萬石於遼東 二十二年令海運蘇州太倉糧米六十萬石以給遼東 官軍所謂海運者是也蓋是時止以餉邊而已 三十年海運糧七十萬石於遼東

按是時海船有一千料有四百料名鑽風海船後永樂中改海運遂改四百料爲淺船淺船因海船得名

成祖永樂元年令於淮安用船可載三百石以上者運糧入淮河沙河至陳州潁岐口跌坡下用淺船可載一百

石以上者運至跌坡上別以大船載入黃河至八柳樹等處令河南車夫赴衛河轉輸北京此變海運之始 六年海運糧六十五萬一千二百二十石于北京時駕駐北平百費仰之不但餉邊矣 十二年海運糧四十八萬四千八百一十石于通州又衛河僭運糧四十五萬二千七百七十六石于北京所謂海陸兼運者是也 十三年時會通河成遂令浙江嘉湖杭與直隸蘇松常鎮等秋糧除存畱并起運南京供 內府等項外其餘原坐太倉海運之數盡改撥運淮安倉交收揚州鳳陽淮安三府秋糧內每歲定撥六十萬石運至徐州倉交收徐州并山東兗州府秋糧內每歲定撥三十萬

石俱令民運赴濟寧倉交收河南山東稅糧令民運至臨清倉交收仍令淺河船於會通河以三千隻支淮安糧運至濟寧倉以二千隻支濟寧糧運赴通州倉每歲通運四次所謂支運者是也其天津并通州等衛各撥官軍於通州接運至京蓋自是海運不復行矣先是遣平江伯陳瑄往湖廣江西等處造舟二千艘以從河運瑄建言造平底淺船甚稱便焉歲可運三百餘萬石至京是時遮洋船每歲於河南山東小灘等水次兌運糧三十萬石於天津等衛倉收二十四萬石連耗折銀六錢俱從直沽入海轉運薊州倉收是年又令浙江都司并直隸衛分官軍於淮安運糧至徐州置倉收

京衛官軍於徐州運糧於德州置倉收國山東河南都司官軍於德州運糧至通州交收淮安常盈倉本部各委主事一員監督收放其僱運糧每石俱兩平斛斗收放官軍僱運止一尖一平定爲例末年瑄復計議凡民運糧俱於淮安瓜洲補給腳價兌與軍船領運瑄又奏請于淮安瓜洲水次令軍民於此對船交兌令軍船出給通關付還與民銷繳仍令民補腳價在淮安水次者每正糧一石外加五斗在瓜洲水次者每正糧一石加五斗五升十六年僱運糧四百六十四萬六千五百三十石於北京是年令浙江湖廣江西并蘇松常鎮等處稅糧除存留及起運南京外餘糧坐撥一百五

十萬石零糧里人戶自備船隻運赴北京通州河西務等處上倉二十一年奏准每歲漕運以兩運赴京倉一運赴通州倉交納

宣宗宣德二年令浙江江西湖廣并直隸蘇松等處起運淮安徐州倉糧撥民自運赴通州倉其運糧官軍於淮安南京支運四年仍令江西湖廣浙江民運糧一百五十萬石貯淮安倉蘇松寧國池州廬州安慶廣德民運糧二百七十四萬石貯徐州倉應天鎮江常州太平淮安揚州鳳陽及滁州和州民運糧二百二十萬石貯臨清倉令官軍支運山東河南北直隸府州縣糧經赴北京其僱運軍船量地遠近與糧多寡如淮安上糧民

船一抽其一徐州十二抽一臨清十五抽一給與官軍兼舊船運載五年令河南南陽懷慶汝寧三府糧運於臨清倉開封彰德衛輝三府糧運於德州倉交收是年又令江南民糧兌撥附近衛所官軍運載至京量其遠近給與路費耗米此兌運之漸也六年奏准浙江江西湖廣蘇松常鎮太平等府僉撥民丁及軍多衛所添撥軍士與見運軍士通二十四萬分兩班更替僱運所謂僱運之初皆支運者是也七年始立兌運法先是各處糧米民運淮安徐州臨清德州水次四倉交收漕運官軍分派官轉運於通州天津二倉往返經年以故民違農業永樂末從侍郎周忱議始令民運於淮

安瓜洲補給脚價兌與運軍軍民兩益衛所出給通關
付繳後叅將吳亮又言遂令江西浙江湖廣江南等處
糧米各官軍於各附近水次領兌南京江北府州縣糧
於瓜洲淮安交兌其淮徐臨德四倉仍支運十分之四
浙江蘇松等船各於本地方領兌不盡者仍赴瓜淮交
兌河南所屬民糧運至大名府小灘兌與遮洋海船官
軍領運山東濟南州縣於濟寧交兌官軍領兌必量其
地之遠近費之多少定爲加耗脚米則例又給以輕齎
銀兩以爲洪腫盤剥之費許其附載貨物以爲沿途衣
食之資是謂轉運變而爲兌運也 是年又增撥南京
豹韜左等衛及各都司直隸衛所軍餘并見運官軍共

一十六萬僭運糧儲

憲宗成化七年都御史滕昭議罷瓜淮兌運裏河官軍顧
江船於江南水次交兌民加過江之費浙江等處每正
糧一石外加過江米一斗南直隸等處每正糧一石外
加過江米一斗三升是謂兌運變而爲長運也 十年
始立改兌法先是江西應天蘇松等處糧民自運上納
淮徐臨德四倉官軍赴倉支領運送京通二倉至是議
抽支運米七十萬石改令官軍各赴彼水次交兌
國初漕額歲運四百萬八千九百九十八石九斗九升二
合

宣宗宣德八年僭運糧五百餘萬石通倉收二分京倉收

八分

英宗正統二年僭運糧四百五十六萬石通州收六分京倉收四分

景皇帝景泰二年僭運糧四百二十三萬五千石 七年官軍兌運糧二百八十一萬三千四百八十石於淮安臨清東昌徐州德州有糧倉收支運一十一萬六千二百石三斗共運糧二百九十二萬九千五百五十石三斗內遮洋船運糧三十萬石以二十四萬石於蘇州倉收六萬石於京通二倉收

英宗天順四年僭運糧四百三十五萬石內兌運三百六十三萬八千二百石淮安臨清徐州倉支運七十一萬

一千八百石內遮洋船運三十萬石以二十四萬石於蘇州倉收六萬石於天津等衛倉收

憲宗成化八年定僭運糧每歲四百萬石

孝宗弘治二年僭運糧四百萬石內兌運二百三十萬石支運七十萬石

武宗正德六年僭運糧四百萬石內兌運三百三十萬石改兌六十三萬三千石支運倉糧六萬七千石

世宗嘉靖元年僭運糧四百萬石內兌運三百三十萬石改兌六十二萬九千四百石支運倉糧七萬六百石二十八年見行議單每漕運四百萬石內該兌運三百三十萬石改兌七十萬石

各省直兌運數

浙江六十萬石 江西四十萬石 湖廣二十五萬石

內折色三萬七千七百三十四石七斗 應天府一十萬石 蘇州府六

十五萬五千石 松江府二十萬三千石 常州府一

十七萬五千石 鎮江府八萬石 寧國府三萬石

池州府二萬五千石 廬州府一萬石 淮安府二萬

五千石 太平府一萬七千石 安慶府六萬石 鳳

陽府三萬石 揚州府六萬石 徐州三萬石 山東

二十八萬石 內折色七萬石 河南二十七萬石 內折色七萬石

各改兌運數

江西一十七萬石 應天府二萬八千石 蘇州府四

萬二千石 松江府二萬九千九百五十石 廣德州

八千石 鎮江府一萬石 淮安府一萬一千五百石

以上舊俱運淮安府常盈倉 浙江三萬石 揚州府三萬七千石

鳳陽府三萬三百石 徐州一萬八千石 鎮江府

一萬二千石 淮安府六萬九千石 以上舊運徐州廣運倉 山

東二萬六百石 河南五萬石 以上舊運臨清廣積倉 山東七

萬五千石 河南六萬石 以上舊運德州倉

又支運米六十四萬四千八十三石三斗

天津倉米六萬石 薊州倉本色米十萬石折色米一

十四萬石 密雲鎮米一十五萬四千八百一十石八

斗 昌平鎮米一十八萬九千二百七十二石五斗 以上

即上兌
運內數

又預備米一十九萬四千四百石

臨清廣積倉收山東五萬四百石又河南六萬石 德
州德州倉收山東六萬石又河南二萬石

漕運總數

漕糧先年俱民運淮徐臨德四倉軍船接運入京通二
倉名爲支運永樂末始令民運赴淮安瓜洲補給腳價
兌與軍船領運名爲兌運其四倉仍十之三四後兌運
漸增又令軍船各回附近水次領兌民加與過江腳價
視遠近爲差成化十一等年改四倉米七十萬石令各
軍徑赴水次領兌名爲改兌其兌運中又分支運米

天津薊州密雲昌平其正額外又有預備米貯於臨德
二倉歲運米四百萬石北糧七十五萬五千六百石南
糧三百二十四萬四千四百石內兌運三百三十萬石
改兌七十萬石除例折外每年實通運正耗糧五百一
十八萬九千七百石 前項兌糧米倘災傷等項停免
聽各該巡撫官如蘇州府有災該免則於附近松江常
州等處撥補足數安慶府有災該免則於附近太平府
撥補足數其餘府分有災俱照此例奏補候災傷府分
有收仍照撥補之數徵完如果附近府分各有災傷無
處湊補漕運就將臨德二倉收貯糧米照數支運務要
不失原運四百萬之數 漕運總兵官萬表疏舊例漕

運糧四百萬石倘有災傷等項停免於附近府分撥補附近府分各有災傷就臨德二倉照數支運庶不失原運四百萬石之數續以臨德二倉糧米有限故准折銀臣愚以為理財之道莫要于本折通融如豐年米賤全運本色遇災傷量減折色而本折相兼為用國計亦不為無補漕運糧斛除河道工役之費其輕齎耗米并脩造淺船糧銀官軍行月等糧率四石致一石艱難險阻實不易得如今年支運京軍月糧每米一石不過易銀三錢難得而賤用似為可惜若以先年所收折銀每石七錢者作二石放支候至米貴之年方放本色則軍需實濟矣 俞諫漕例疏漕運糧船先年海運至京俱

經文武大臣建議開濬會通河分十二總遂罷海運其歲運糧四百萬石內蘇州邊儲獨遮洋一總尚留南京水軍左等八衛江北淮揚等五衛軍船俱於小灘鎮等水次兌運山東河南糧米三十萬石仍由海道以抵薊州天津二倉成化間又因海道不便姑自小直沽開通新河一道當時遮洋海船每二隻該旗軍三十六名改造五百二十五隻旗軍六千三百名時船隻運道雖改衛所官軍俱仍舊役雖或愛禮存羊而其地理之遠近往來之怠緩軍船之狼狽糧運之稽遲誠有如郎中趙戴之所言者矣至若河南一總上下兩江催餉甚遠不免顧此失彼而趙戴又復言及皆切漕運要務查得南

京淮揚等一十三衛官軍昔因習知海道在於遮洋今日既由新河僭運却乃空身自南趨北不惟途路艱辛人情事體甚為不便抑且江北船多摘撥江南就兌加費過江一三脚米而南京行糧且又重費年復一年尤當愛惜况遮洋元年議准折色數多軍額減存但辦料數少食糧則多亦應區處及查北直隸總下德州天津二倉不惟道途近甚抑且原運正耗相若人情允便所宜改撥合將遮洋江北淮太高揚長淮五衛旗軍三千三百一十二名照舊不動外將北直隸總下德州天津等衛共九衛旗軍一千七百六十四名并入本總其不足之數再於附近徐州左泗二衛添撥旗軍一千二百

二十四名通抵南京遠軍共足六千三百名原數以備歲運三十萬石舊額仍於遮洋總處就令孫機管理遇有減存臨時酌派以蘇軍困仍將孫機原額退與南京領駕其退下南京水軍左等八衛官軍添入江南分爲上下江二總就以程鵬二人分管旗軍仍每船十名船不過壩亦各存與過江米六升却將原一二裁去七升各總以截上江者兌安慶池太廣德等府州糧米多餘軍船領兌江西不盡之糧下江者兌蘇松常鎮四府糧米多餘軍船領兌浙江不盡之糧通共爲一總其南京二總每年却分浙江二處儘總撥兌餘船方撥江南至若浙江等總軍船雖有多寡亦每就近酌派事不大害

不必槩爲更張其改撥遞洋行糧查照議單北直隸者仍舊二石徐州左泗二衛俱照淮太二石八斗如此庶水軍左等八衛得以就近領兌江南之糧免駕空船北行江南一總得以分投催餉亦免往來督兌之難遠近適均水程順便而糧運不致稽延且行脚米亦得以少省矣

廣東陳建云嘉靖數年間河益南徙而衝渦奔毫震驚皇陵徐房而南安東淮北皆被其害以河流無所分而一淮不足以並容全河之委也衆說紛紛愚謂欲河之北以循古道者爲河患也猶幸其南所以佐漕也顧河能佐漕亦能決漕累朝挑濬之費已不貲矣故嘗有言曰前代之河決也不過損民田廬故治之者在急除民害 國家之河決也患及漕運故治之者事關 國計今日治河視古豈不尤難哉

加耗輕齎數

兌運米

江西湖廣浙江每石加耗米六斗六升又兩尖米一斗共七斗六升內除四斗隨船作耗餘米三斗六升折銀一錢八分名三六輕齎

江南直隸并江北廬州等府每石加耗米五斗六升又兩尖米一斗共六斗六升內除四斗隨船作耗餘米二斗六升折銀一錢三分名二六輕齎

山東河南府州縣每石加耗米三斗一升又兩尖米一斗共四斗一升內除二斗五升隨船作耗餘米一斗六升折銀八分名一六輕齋

已上輕齋銀俱備運軍盤剝費用後濬通惠河成始立減扣之法除一六照舊外其二六者原餘米二斗六升減去二升改爲二四輕齋於內仍扣銀一分三六者原餘米三斗六升減去二升改爲三四輕齋於內仍扣留銀二分扣留者以備修理通惠河閘座等項支用量減者以寬民力

改兌米

浙江江西每石加耗米四斗二升應天并江南直隸每

石加耗米三斗二升

北直隸每石加耗米二斗七升

已上各加耗內各折米二升易銀一分名折易輕齋銀餘俱本色

徐州每石加耗米二斗二升

山東河南每石加耗米一斗七升遮洋船一斗五升

已上俱本色凡改兌糧盤剝之費各吃本總兌運輕齋銀與各折易銀兼支名爲吃貼

宣宗宣德八年令兌運民糧加耗湖廣每一石八斗江西浙江七斗南直隸六斗江北揚州淮安鳳陽五斗徐州四斗山東河南三斗若民自運至淮安瓜洲等處兌軍

者四斗 十年令湖廣江西浙江耗米俱六斗江南直
隸五斗江北直隸四斗徐州三斗五升山東河南二斗
五升 又令各處起運京倉大小米麥先封乾圓潔淨
樣米送部轉發各倉收候運糧到日比對相同方許收
納

英宗正統元年奏准兌運糧加耗江北淮安鳳陽四斗五
升浙江蘇松等府民自運至瓜洲兌運者三斗七升淮
安者三斗餘如舊 十三年令湖廣江西浙江加耗俱
六斗五升江北揚州淮安鳳陽四斗五升河南民糧於
蕭縣水次兌者四斗民自運至瓜淮等處兌軍運者三
斗其兌運料豆加耗亦准此例

憲宗成化六年奏罷蘇松等府民運糧仍舊軍運 十年
令湖廣江西浙江加耗每石四斗應天并江南直隸各
府一斗五升徐州二斗山東河南一斗五升 十一年
罷民運淮徐臨德等倉糧令軍船徑至水次領兌運送
京通二倉交納 二十三年令改造遮洋運船爲淺船
從新河僱運其運糧并人夫亦照淺船例均派每船旗
軍十名

孝宗弘治二年令官軍上納京通二倉糧兌運者加耗七
升改兌者四升支運并遮洋船仍舊一尖一平收受
十八年 詔明年漕運米以十分爲率內二分照例折
銀以蘇民困

武宗正德十年奏准輕齎銀兩各司府州縣每年各隨正糧一併兌完方許出給通關 十六年奏准各處原派臨清倉民運糧七萬六百石今後照數徵完就於各水次聽漕運衙門撥到軍船交兌不必民運到倉

世宗嘉靖五年令以 顯陵衛原運湖廣正糧二萬三千九百三十四石七斗折銀解赴太倉收納船隻派與無船衛分撐駕 六年奏准開濬通惠河修理閘座築堤立壩造船盤剝以便糧運每年二月本部請 勅給赴通倉坐糧員外會同巡倉御史督理其各總輕齎銀兩照例驗給扣省脚價解部轉送太倉銀庫交收以備修河等項支用羨餘銀兩給散運軍 八年議准湖廣浙

江江西江南江北等總漕運衙門各將解到輕齎銀兩量給十分之三責付把總收領以備官軍沿途盤剝之費七分照舊驗封候完糧扣羨其山東河南輕齎不必先給 又議准官軍過江領兌蘇州等處糧米者江北三總并廬州衛每石過江脚米一斗三升南京兩總并鎮江衛每石七升其廬州衛本府兌者六升 十一年題准遮洋額運本色米除六萬石原運天津外其運薊州倉一十萬石將數內四萬石每石連耗徵價銀九錢遇放支官軍附近衛所給與本色其太平寨燕河營等寫遠去處與本色相兼支放每石折銀六錢五分扣除銀兩通融支放 十二年又議准自本年為始過江脚

米一斗三升內將七升每斗折銀六分以爲顧船之資
六升仍舊本色以爲過壩盤剝之費十六年又議准
兌運糧米照舊分派京倉七分通倉三分改兌京倉四
分通倉六分合貼腳價於兌運輕齎銀兩照舊挖給

漕運程限

憲宗成化八年令運糧至京倉北直隸并河南山東衛所
限五月初一日南直隸并鳳陽等衛所限七月初一日
若過江支兌者限八月初一日浙江江西湖廣都司衛
所限九月初一日其把總都指揮及領運千百戶等官
違限二十日以上住俸待罪若連運三年違限者遞降
一級二年不違限者量加獎勵三年不違限者量加旌

擢俱奏請定奪

孝宗弘治八年奏准各處兌運糧每歲布按二司及直隸
府州縣管糧官督屬徵收年終赴運水次候正月交兌
初違限一年二年者附過還職連違限三年者以罷軟
起送吏部其各該分巡分守管糧官員以十分爲率五
分不完者亦照此例管運官照府州縣例把總官照分
巡分守例連違限三年聽漕運衙門黜退不許管軍管
事

武宗正德五年令漕運衙門以漕運水程日數列爲圖格
給與各幫官員收掌逐日將行止地方填註一格同原
給幫帖送部查考事完送漕運衙門查繳無故違悞運

官住俸問罪若有司交兌遲延罪歸有司

世宗嘉靖二年令自今年爲始部倉查各官到部完納月日比先早一月者指揮等官量加犒勞三次俱早一月把總等官於實職上陞一級比先年遲者卽送法司問罪照例發落 八年又議准南直隸浙江坐派起運內府各監局及吏部等衙門細熟白糙粳糯米等每年十月終徵足差官十二月以裏開船前來交納如違照兌運事例叅奏治罪 十四年題准今後一應兌軍改兌秋糧務在及時派徵依例限運赴水次聽候交兌若正月終有司無糧軍衛無船者府州縣掌印管糧官領運指揮千百戶各住俸半年二月終無糧無船者問罪住俸一年延至三月終船糧不到府州縣掌印管糧官領運指揮千百戶提問降二級四月終船糧不到不分多寡連布政司掌印管糧官領運把總通降二級文職起送吏部別用軍職發回原衛帶俸差操

考察運官

孝宗弘治十三年令本部會同兵部及漕運都御史等官考察運糧各衛所指揮千百戶廉幹有爲者存留管事貪婪無爲者革退另選相應官代補

世宗嘉靖十四年題准運糧把總衛所總等官每三年一次戶兵二部會同考察分別去留等第奏請定奪千百戶鎮撫等官亦三年一次漕運衙門考選各處衛所總

續文獻通考 卷之三十三
官有缺查照節年有領運年深諳練漕事或僉書軍政等官素有才力者選擇取補如有科擾軍士侵費錢糧等項聽漕運衙門本部監兌委官并巡按御史指實叅究黜罰不在三年考察之限

漕運月糧

成祖永樂十三年令各衛所運糧官軍行糧每員名不分遠近俱支三石以後增減事例不同

世宗嘉靖十七年議准今後運軍月糧先將應徵存留糧斛依期徵給如徵有不及或災傷停免聽將倉庫別項錢糧預行通融處給其行糧例該本處闕支者雖派別省兌運仍舊在於本處若兌本省原議水次隨支

要預期徵完隨同正糧一并交兌如果徵收不齊行糧每石折銀五錢月糧查照彼中折筭處給

漕運漂流

世宗嘉靖八年議准沿途遇風損壞船隻漂流糧米許赴所在官司具實陳告掌印官親詣漂流處所勘實具奏仍候本部轉行巡按御史覆勘明白方許除豁如有乘機侵盜扶同勘報情弊就將漕運官軍并有司官吏通行叅送法司問罪俱發邊衛充軍 又議准漂流糧米例該減除通州上納者如遇通州倉缺厥仍令赴京倉上納每漂流一百二十石免曬一千石亦兩平收受每石計省曬折米五升并耗米七升共一斗二升以補漂

流之數前項米石俱不挨陳先行放支

漕運雜行

宣宗宣德十年令漕運總兵官每年八月赴京議事

周忱言行錄云宣德間公爲工部右侍郎巡撫南直隸初蘇州府稅糧負欠七百九十餘萬石常松亦然公至詢父老皆云蘇松民俗大戶不出加耗以致小戶連累納欠公乃使大小戶一例加耗官降斛斗久失糧長往往私造大入小出公奏行南京工部鑄造鐵斛發屬縣依造木斛較勘烙印給與糧長收槩於是出入均平蘇州糧額二百九十餘萬石公同知府况鍾奏減八十餘萬石舊例不許團局收糧糧長自徵收公曰此負欠之

由也遂令各縣於水次置圍編團聚一處推糧長一人總之名曰總收定與加耗總徵平米上團每團設糧頭團戶各一名管收置立撥運文簿支撥起運加耗者正糧一石收平米一石七斗候起運之時酌量支撥如京通等倉遠運正米一石支與三石臨清淮安南京等倉以次定支置立綱運文簿聽其剝淺等項費用填註回銷支撥羨餘存積在倉號曰餘米次年餘多令加六徵收又次年益多令加五除依前撥運外猶有附餘令各縣造倉一所名曰濟農將過年餘米入以補賑濟

英宗正統十三年令各處兌運民糧每二石與新蘆蓆一領其淮安等處倉支運者每二石領墊倉舊蓆一領至

京通二倉每百領除損壞止納七十領

憲宗成化六年十月戶部會官議巡撫漕運等官所陳事宜其一蘇州松江常州及嘉興湖州五府輸運內府白熟粳糯米并各府部糙粳米每歲十六萬石俱官給以船今經沿途輓廠鈔關必欲如民船帶輓納鈔兼遇水涸守閘又爲運軍凌逼及抵揚州等處則攬頭包攬巧肆刻削是以留滯日久困於負貸請罷帶輓納鈔之例及禁包攬之害仍移文漕運官令軍民船皆魚貫而行其有漂流糧米以該納京倉者改納通州省腳價以補其數上從之

萬表云太倉起剝則例一廩兌正糧一萬二千石每石加耗米七升共計八百四十石約定四百八十石作正支銷餘准作耗數內扣五十石或一百石其欠二百石以上經歷官攢甲斗級照依欠數多寡責治有差數外間有餘剩者則是多收之數不敢別作支銷節年於倉中隙地掘窖埋之後主收者日苛剩餘者漸多嘉靖十三年周侍郎叙初督倉場見餘米歲埋歲多心切惜之乃言於大司徒梁公材公曰此出耗米附餘四百四十石之外若欲具題作正支銷主收者法應叅究况起此附餘之端他日害大計矣寧復棄之不敢作備也周乃貯之空廩以數作一手本報部公亦不受令總督廳自計乃知老臣固識體耳夫每廩明交耗糧八百四十

石以其不得盡耗責以四百八十石附餘作正支銷然
或缺少亦止於責治而已不爲深究蓋恐後之流弊至
於多收也宣德年間京通二倉收受斛米一尖一平尖
斛淋尖平斛槩行後將淋尖斛外餘米俱要入官有虧
旗甲至元年叅將袁佑奏要每石不分平尖明加一斗
俱各鐵斛收受戶部題奉 欽依只加耗五升此佑之
見惟目前之圖而無長久之慮彼當事者有存寬厚之
意耳至二年又該戶部題准加八升今載入議單每石
兌運加耗七升則原爲尖斛而增今于加耗之外復收
斛面以爲附餘則是耗外又有加耗矣正德十六年表
總浙運時每石只加七升以進倉便穀交納常有餘剩
之米照出今每石加二五進倉尚有掛欠若不革去耗
外斛面行槩平收則軍逃運敝雖有善者亦無如之何
蓋雖取之斛面餘米不多而 國計根本所繫爲害者
大此只十數年來之弊老成籌國者固當革弊以存大
計可也

孝宗弘治十八年令張家灣水兌糧米脚價每石原定一
錢者減作八分天津衛寄收糧米脚價每石原定一錢
五分者減作一錢二分其扣下京衛事故官軍兌支不
盡正耗之數及明加免曬折席等項有米者俱准運赴
通倉上納無米者每石折銀五錢與脚價銀兩俱送太
倉銀庫交收

武宗正德九年奏定起旱脚價自張家灣至京倉晴乾日每銀一兩起載米一十七石陰濕一十三石天色初晴道路猶濕一十五石張家灣里兒寺至通倉每銀一兩起載三十三石長店兒至通倉四十石灘子里至通倉五十石自十年以後各總運船到灣之日即將前項脚價於戶部委官處驗封交收以憑支給

世宗嘉靖八年議准司府州縣管糧官各於水次同兌運官將成化十五年原頒降永爲法則字樣鐵斛與依式成造印記木斛較量相同就便交兌如有將私造大斛用強交兌者監兌官及撫按官依律照例拿問 又議准把總指揮千百戶等官索要運軍常例銀兩科索至

十兩以上者問罪降一級二十兩以上者降二級四十兩以上者降三級發原衛帶俸差操再不准用至五十兩以上者問罪發邊遠充軍跟官書算人等科索軍士銀兩侵欺入已至十兩以上者問發永遠充軍 又議准兌軍民糧交納蘆蓆以三分爲率二分納本色一分折銀每領折銀一分又每米二千石納楞木一根松板九片亦以三分爲率二分納本色一分納銀每板一片折銀二錢五分俱隨糧收受出給通關其銀太倉銀庫另貯以備修倉等項支用薊州天津四倉蘆蓆與京通倉例同松板楞木每船交納用銀八錢 又議准通惠河經紀船脚每糧一石銀二分一厘一絲八忽二微六

開水脚每石銀九厘一毫三絲九忽一微車戶車脚每石銀一分四厘八毫四絲二忽七微京通倉歇家包囤每石銀八厘五毫曬夫飯米每船一兩一錢小脚耗糧到囤每石四厘僱人抱籌抬斛打捲每石七毫買墊囤葦把每船二錢買掀掃把斗每船三錢軍斗籌價每石銀五厘京倉蓆板隨船帶至大通橋蓆令車戶帶運備雨每板一片木一根各准米一石起脚京通倉運官交糧紙劄銀每處二兩官軍房水銀指揮三兩千戶百戶各二兩旗軍每船京倉一兩二錢通倉一兩各該把總遇糧運到倉呈驗輕齎之後先將前銀交送京通二倉坐糧員外收貯提督官給發印信文簿各二扇一扇查

收一扇查給在運官者領用在倉中者歇脚領用

邵寶曰我朝運法所謂法者即今支運是也故有淮徐臨德水次四倉以受民間輸納運官者於斯領焉歸於京通二倉雖遇災傷民有免徵而軍無免運支者不必出當年之民納納者不必供當年之軍支蓋通數年以爲哀益雖歲有豐歉而常數不缺及支變爲兌繼而又有改兌向者轉輸今也直達派徵免納叢於一歲之中於是軍無餘力而缺於常數豈得已哉若今南有非常之水北有非常之寇則又不待論也當是之時所謂變通者無他不過漸復支運之法而已支運之難難於脚價不足則糧不自行其理然也苟能預處脚價以擬

兵荒之事於舊例支運七十萬石之外每遇欠缺則支以補之歲不失四百萬石之數此於國計爲便不可不慮而處之也

脚耗輕齋新例

今上萬曆元年題准江北三總派兌南糧原定脚米一斗三升顧覓江船今瓜洲建閘徑赴水次聽兌蠲免七升止徵六升其南京各衛通到水次原徵七升今免一升止徵六升二年題准各處隨糧輕齋銀通解漕司內將三分給運官其七分選定解官稱驗明白各令入鞘類至十萬上下裝入標船星夜越幫前進送通倉坐糧郎中稱過寄庫候該幫船到驗給運官完糧其山東河

商者原不過淮責成臨清兵備差官陸路解進七年令輕齋銀兩照議單分爲三七以三分給本幫備船沿途空貼等費其羨餘兌給回南旗軍一分餘候完掣通關之日查無掛欠亦便與運官領回分給不必扣貯十一年以江西饒州等五所淺船改并進賢水次修造免徵過期湖米銀十三年題准輕齋羨餘銀舊例一分解准二分給軍今照萬曆七年例惟山東遮洋二總每船仍止給銀一兩中都錦衣旗手上江下江淮安揚州七總原議每船一兩五錢今增五錢共二兩浙東浙西湖廣江西四總原議每船三兩今增一兩共四兩其扣省銀兩京倉八項通倉六項照舊扣除

新定漕規

今上萬曆元年題准湖廣衡永荆岳長沙漕糧原在城陵磯交兌者改并漢口水次 十一年改漢口交兌於金沙洲陳公套水次

凡樣米萬曆四年議准各處樣米山東河南限正月江北直隸限二月江南直隸限三月浙江湖廣限四月各分頭幫解送總督衙門收候運糧到日轉發各倉比對凡運糧程限萬曆二年題准舊例湖廣江西浙江三總限三月過淮者多與黃水相值今定限二月過淮如違查久近分別治罪

凡優恤官軍萬曆七年題准領運等官應給盤纏但經

以贓私不法叅論者盡行停給完報違限三月以上而過淮先期依期與完糧不違限而過淮後期及淮北例不過淮而完糧違限三月以上各給一半過淮後期完糧違限三月以上給與三分之一完糧違限五月以上不論過淮先期盡行停給運軍應得羨餘姑准給與其停扣銀兩俱類解太倉 十二年議准運軍中途病故預支安家月糧俱免還官仍優恤二年其遺下行糧給本船旗軍以充顧募免下年扣除若中途脫逃者獲日問罪仍追安家月糧還官 又議准運軍土宜監兌糧儲等官水次先行搜檢督押司道及府佐官員沿途稽查經過儀真聽僨運御史盤詰淮安天津聽理刑主事

兵備道盤詰六十石之外俱行入官前途經盤官員徇情賣法一併恭治其餘衙門俱免投文盤詰

凡漂流萬曆元年議准凡官旗漂流船糧卽赴所在督押司道陳告當日委官親勘具奏收糧之日減除免曬處補若未經奏到雖有執照卽係假捏不得一槩混支其起欠掛欠明係侵欺與漂欠不同不得妄援前例

六年題准如遇漂流在楊子江者先赴催餉把總處具告一面赴督押司道官處告委有司相去一百里者限二日一百里外者限四日勘實呈漕司卽與具奏除豁如有違限扶捏等弊卽將勘官恭問官旗分別捏報漂欠虛數多寡問擬重罪其河道漂流者卽令本幫補納

不敷量動槩幫潤米攤補不得一槩奏豁 十二年議

准漕運官軍如有水次折乾沿途盜賣自度糧米短少故將船放失漂流及雖係漂流損失不多乘機侵匿捏作全數賄囑有司官吏扶同奏勘者前後幫船及地方居民有能覺察告首漕運官司查實給賞輕齎銀十兩官軍不分賊數多少俱照例發邊衛永遠充軍有司官吏從重問擬仍行原衛所將失事之人家產變賣抵償不許輕扣別軍月糧以長姦惡前後幫船知而不舉一體連坐仍于正犯所欠錢糧內責令幫賠十分之三又議准漂流糧米三千石以上提問把總官不及數者止提問本管官旗 又議准漕運把總指揮千百戶等

官如有漂流數多把總三千石指揮及千戶等官全幫領運者一千石千戶五百石百戶鎮撫二百五十石俱問罪於見在職級上降一級有能自備銀兩不費別軍羨餘當年處補完足者免其問降若願隨下年糧運補完亦准復職止完一半准復一級三年內儘數補完亦准復原職

凡掛欠萬曆二年題准掛欠官員果故絕無人承襲將原欠糧銀除豁免追以後把總官任內如分毫顆粒掛欠縱陞遷不許離任敢有朦朧赴任者忝提革任問罪監追 十二年議准運糧官旗掛欠數多把總名下三千石或銀一千五百兩以上指揮名下及千戶等官全

幫領運者一千石銀五百兩以上千戶五百石銀二百五十兩以上百戶鎮撫等官二百五十石銀一百二十兩以上各遞降一級每一倍加一等有能當年補完者通免降級如下年補完及三年內全完者准奏復原職其一應提問官旗各省及直隸江南衛分行各該巡按御史南京并江北衛分行漕運衙門各就近提問以便完結

漕禁新例

今上萬曆九年題准備行各監兌官及兼理漕運御史將該兌糧米眼同州縣官并運官看驗明白交兌取具有司結狀運官領狀備將緊要數目字樣用印鈐蓋各一

樣四本一存監兌委官一送漕運衙門一送戶部一送
 總督衙門案候收糧如米色與結狀不同即係官旗揀
 和若有司縱容糧長將爛米搪塞不肯從實結報各從
 重叅究 十二年議准軍旗有欲呈告運官不法事情
 者許候糧運過淮并完糧回南之日赴漕司告理如赴
 別衙門挾告詐財者聽把總官就拿送問該徒罪以上
 調發邊衛充軍另拘戶丁補伍 又議准漕運官軍敢
 有水次折乾及中途糶賣以致抵壩起欠及臨倉掛欠
 者即係侵欺除正犯查照律例問擬外其餘官旗仍各
 總計名下欠數總小旗欠一百石問發哨瞭百戶鎮撫
 欠二百五十石千戶欠五百石指揮及千戶等官全幫

領運者欠一千石把總官欠三千石俱問罪降一級發
 原衛所帶俸差操有能臨時設法買補完足止作折賣
 正犯各官旗免罪其雖不係侵盜但有虧折俱照前例
 擬斷若總欠數多及粗惡不堪至三萬石以上總督總
 兵等官另行奏請定奪 又議准漕運把總指揮千百
 戶等官索要運軍常例及指以供辦等費為由科索并
 扣除行月糧與船料等項值銀三十兩以上者問罪立
 功五年滿日降一級帶俸差操如未及三十兩者止照
 常科斷其跟官書美人等指稱使用科索軍人財物入
 已者計贓論罪如至二十兩以上發邊衛充軍 又議
 准衛所官完糧後備造支銷數目呈報稽考若有造報

續文獻通考 卷之三十一
不明及侵欺靠損情弊許運軍指實首告各查照律例
從重問擬把總官失于覺察叅問治罪 又題准凡漕
運錢糧有侵盜銀三百兩糧六百石以上俱照侵盜本
律仍作真犯死罪係監守盜者斬係常人盜者絞

民運

今上萬曆九年議准行漕司及各巡撫將江南五府應運
白糧令各糧長仍顧五百料中船勿令夾帶私貨應得
水脚當官議定先給一半其餘印封船過徐州總部官
驗給 又題准每歲解京白糧務點殷實糧戶正身解
納不許棍徒包攬應運米數先儘本名如有官戶銀米
責令運送倉庫轉給領解以杜短少賠累船隻許令糧

長自顧五百料中船每百石定給銀三十三兩埠頭等
役悉行查革經過鈔關如果止于土宜四十石免其納
稅糧至丁字沽以北河西務正事卽照軍糧所定脚價
撥船起剥經紀搬抗過壩不許仍前寄囤如有積棍攬
解歇家科擾等弊聽巡視科道叅究糧完之日解戶批
單給發部運官領回類繳各有司不必監比家屬仍刊
稽獎文票聽巡倉御史查給稽繳

完運

今上萬曆九年題准奠靖倉原撥漕糧十五萬石內將二
萬石自沙子營陸運改撥居庸倉收貯轉放居庸黃花
橫嶺三路官軍月糧以免召商勞費其搬運脚價奠靖

倉每石銀四分今每石加一分共加銀二百兩責令殷實商役領運 十一年議准營州左屯衛官軍月糧遠赴通倉不便自萬曆十二年為始每年漕糧到日通州管糧郎中撥發二千五百石就令昌鎮運糧經紀自通州水運至順義縣小東莊每石給腳價銀三分七厘五毫自小東莊陸運至城每石給銀五厘俱在隨糧輕齎銀內動支該衛官軍逐月關領

漕運職官

總督 都御史一員 總兵官一員

把總 南京二員 中都留守司一員 浙江二員

江西二員 湖廣一員 山東一員

江北直隸二員 江南直隸二員

監兌 戶部主事五員

每歲于漕運議事畢選差請 勅分往山東河南直隸浙江江西湖廣督軍民有司依期交兌催備起程南運督至儀真與僱運官交接明白即將各兌完起程并交接日期報部查考回日仍將兌完日期具奏

僱運 御史一員 舊用戶部郎中三月奏差今改御史

押運 叅政一員 舊有協同漕運叅將二員今革

理刑 刑部主事一員 三年代萬曆二年革十一年復

景皇帝景泰二年始置 欽差總督漕運都御史一員駐

淮安府

英宗天順二年始設理刑刑部主事二員亦駐淮安管廠

工部主事二員駐清江浦監倉戶部主事四員一駐淮安一駐臨清一駐徐州一駐德州管河工部郎中二員一駐安平鎮分理濟寧以北閘一駐高郵州分理濟寧以南閘管洪工部主事二員一駐徐州洪一駐呂梁洪
憲宗成化二十年始設管閘主事二員一駐沛縣沽頭閘一駐濟寧又管泉工部主事一員駐寧陽卽南旺閘清江提舉一員在清江浦衛河提舉一員在臨清 欽差
僸運糧儲兼鎮守地方總兵官一員協同漕運叅將一員俱駐淮安 二十一年令戶部差官一員於山東河南南京差官四員於浙江江西湖廣南直隸各領 勅督同該管糧官依期徵完

武宗正德六年題准照例于左右侍郎內差一員 七年題准改委戶部官四員分往南直隸浙江江西湖廣地方監兌 十一年題准監兌官兌完起程交接明白仍回原兌水次整理下年糧運候交代回京 十五年罷差南京官仍差戶部五員會同巡按御史監兌又差郎中一員於沿河一帶自通州直抵儀真等處嚴督軍有司催僸供用白糧并漕運京儲等項 又題准天津兵備副使帶管白河漕運

世宗嘉靖四十四年題准南直隸浙江江西湖廣等處監兌官各給關防一顆

穆宗隆慶元年正月給事中何起鳴言南直隸浙江杭嘉

湖添差御史一員給之 制書令其專理漕運其濟寧以南河道舊屬兩淮巡鹽御史帶管者并以委之監兌時則巡歷淮安以南水盛時則巡歷徐州以北河道漕運可兼攝而並舉從之 三年題准兩浙巡鹽御史兼督浙江杭嘉湖三府直隸蘇松常鎮四府漕務革監兌官 四年題准漕船起行都御史坐鎮淮安叅將移駐瓜儀總兵任徐州各分經理催督船糧 又題准給僨運把總關防 又議准南京巡屯御史兼督應天太平寧國安慶池州五府及廣德州糧務 五年題准差御史僨運 又題准裁革叅將設叅政一員每年正月移駐瓜儀經理糧船過閘過壩管押到京 又令兩淮

鹽御史兼督廬鳳淮揚四府及滁徐和三州糧務 六年議准徽寧池太兵備兼管糧務 題准給僨運郎中關防

今上萬曆五年題准仍差主事一員往蘇松常鎮監兌六年停差僨運郎中 又令南京二總各衛運官俱與軍政僉書更番領運責成掌印官先期料理仍差南京兵部主事一員專管選補軍旗事務 九年復差主事一員往浙江監兌 十二年令兩浙巡鹽御史仍帶管漕糧止行文督催免其押送鎮江

一員封湖五說矣 十二平今兩湖以鹽賦與少營
 一員封湖五說矣 十二平今兩湖以鹽賦與少營
 六平制去衡重湖中 又令南京二湖各請製官身與
 今上萬歲正平賦湖分去主軍一員封湖五說矣
 六平制去衡重湖中 又令南京二湖各請製官身與
 今上萬歲正平賦湖分去主軍一員封湖五說矣

續文獻通考卷之三十八


皇明進士雲間王圻纂輯

國用考 漕運中

皇明

運官選補事例

武宗正德五年題准運官交糧完日務嚴督軍人將本幫
 船隻督押回還其軍丁有恃頑不行上運不候交兌及
 雖交兌卽棄船回走者將行糧賞鈔盡追入官仍問發
 邊衛充軍另拘戶丁補伍
 世宗嘉靖七年題定考選運官三年一次 又議准淮安
 清江浦管廠指揮聽漕運衙門填註賢否送戶兵二部



與漕運官一體考察去留 八年議准江北直隸等總
係南京衛分者南京兵部選委主事一員係布政司者
各該巡按御史會同監兌守巡兵備等官嚴督各該衛
所軍政掌印官通查原額運軍逃故缺少者先將掌印
任俸另選正伍內精壯旗軍補役正軍不足於空閒餘
丁或別差下選補該衛所無丁同衛所撥補本衛無丁
于本總衛所撥補發各把總官處審驗上運如有已撥
上運又復改差及老弱不堪詭名搪塞等弊並聽漕運
衙門并巡按御史各該委官照例叅究仍將撥過姓名
數目造冊送戶兵二部查考 九年題准運糧官員聽
漕運衙門坐名調取不許擅自補換 十四年題准運

糧把總衛所總等官每三年一次戶兵二部考察分別
去留等第奏請定奪千百戶鎮撫等官亦三年一次漕
運衙門考察南京兵部及各省撫按衙門遇有申告運
官一切患病年老緣事等項必須會行漕運衙門勘實
方許替換若遇考選軍政之期查係戶兵二部原考定
者不得擅爲紛更各處衛所總官有缺於領運及各衛
所僉書軍政等官素有材力者選補其餘管事缺官不
許擅掣運官其各該運官如有科擾侵欺等項實跡悉
聽漕運衙門監兌官并巡按御史指實叅究黜罰不在
三年考察之限 凡衛所運軍不足限一月之內照名
補完若限外不完百戶十名以上千戶二十名以上指

揮三十名以上住俸督補直至完日方許收俸 凡衛所差撥旗軍或正或餘俱選丁力相應之人照例量免幫貼遇有逃故等項移文行取隨即撥補押發上運不許過違十日 凡逃故軍士各該衛所不行僉補者比照京操官軍該班不到事例叅究 二十一年議准凡各總等官三年以上果有廉能幹濟依期完糧不至借債者准令於實職上陞一級 二十二年議准管船旗甲於見役旗軍揀選丁力相應者充當如見運數內不堪者許將在衛城操屯種相應人丁僉補 四十四年題准各總衛所掌印官先期料理下年糧運不得規避延捱其舊運官完掣通關即令掌印間有掛欠另選以

備更番

穆宗隆慶六年題准運糧衛各掌印官會同運官將各船旗甲逐名精選身家有力者選完開造花名長單二張送附近府州縣正堂覆審相應不堪者即與更換用印鈐蓋掌印領運官各分一紙後有壞事損失掌印責賠有司另處原單淮南繳報漕司淮北投天津兵備類繳

各把總分運類

南京把總官二員所轄衛三十四曰錦衣曰府軍曰金吾後曰豹韜左曰驍騎右曰府軍右曰神策曰虎賁左曰留守左曰鷹揚曰鎮南曰留守中曰龍江右曰廣洋曰江陰曰羽林右曰龍虎曰旗守曰橫江曰武德曰留

守右曰金吾前曰瀋陽右曰府軍後曰豹韜曰虎賁右
曰水軍右曰應天曰水軍左曰龍虎右曰興武曰羽林
左曰龍江左曰府軍左 指揮二十五員名千百戶一
百四十二員名旗軍一萬八千八名清江廠造船一千
七百五十九隻運糧五十五萬一千八百八十一石六
斗一升六合

湖廣把總官一員所轄衛一十三曰武昌曰武昌左曰
蘄州曰黃州曰沔陽曰岳州曰荊州曰荊州左曰荊州
右曰襄陽曰德安指揮一十一員名千百戶八十七員
名旗軍一萬七百四名武昌廠造船一千一十二隻運
糧三十四萬八千六百二十四石二斗八合

江西把總官一員所轄衛所一十一曰南昌前曰袁州
曰贛州曰吉安所曰永新所曰建昌所曰撫州所曰廣
信所曰鉛山所曰饒州所 指揮四員名千百戶五十
八員名旗軍九千七百九十四名九江廠造船八百六
十六隻運糧三十萬六百九十五石三斗八升八合
浙江把總官一員所轄衛所一十三曰杭州前右曰紹
興曰寧波曰台州曰温州曰處州曰海寧曰金華所曰
衢州所曰嚴州所曰湖州所曰海寧所 指揮八員名
百戶七十九員名鎮撫四員名旗軍二萬一千六百七
十名蘇州廠造船二千三十九隻運糧六十六萬五千
三百一十一石三斗四升

中都把總官一員所轄衛所二十二曰鳳陽曰鳳陽中
 曰鳳陽右曰留守曰留守中曰懷遠曰長淮曰宿川曰
 武德曰潁川曰洪塘所曰潁上 鎮撫二員名千百戶
 八十三員名旗軍八千七百一十六名清江廠造船八
 百八十七隻運糧六萬七千五百九十八石六斗三升
 三合

江北把總官二員所轄衛所一十八曰淮安曰太河曰
 邳州曰徐州曰徐州左曰壽州曰泗州曰歸德曰揚州
 曰通州曰泰州所曰鹽城所曰興化所曰高郵曰儀真
 曰滁州曰廬州曰六安 指揮一十五員名千百戶一
 百七十六員名旗軍二萬六千七百一十一名清江廠造船

二千六百八十隻運糧八十八萬九千七百七十四石
 一斗二合

江南把總官二員上江一員所轄衛所一十一曰建陽
 曰宣州曰新安曰安慶曰九江曰水軍左曰龍江左曰
 龍江右曰廣洋曰江陰 指揮九員名千百戶九十九
 員名旗軍一萬五千三百八十九名安慶廠造船一千
 四百二十三隻運糧四十七萬二千四百七十三石七
 升

下江一員所轄衛所九曰蘇州曰鎮江曰太倉曰鎮海
 曰松江曰嘉興曰水軍右曰應天曰橫海 指揮二員
 名千百戶十九員名旗軍一千七百六十四名清江廠

造船一百七十七隻運糧五萬四千二百二十九石六斗六合
山東把總官一員所轄衛所七曰臨清曰平山曰東昌
曰濟寧曰兗州曰東平所曰濮州所 指揮七員名千
百戶四十七員名旗軍二千七百六十五名清江廠造
船七百七十三隻運糧二十三萬六千四百一石二升
遮洋把總官一員所轄衛一十六曰通州左曰通州右
曰神武中曰定邊曰天津曰天津右曰德州曰德州右
曰天津左曰德州左曰徐州左曰泗州曰淮安曰太河
曰高郵曰揚州曰長淮 指揮一十二員名千百戶四
十五員名旗軍六千二百名清江廠造船五百五十五

隻運糧二十四萬石

穆宗隆慶元年十月漕運都御史張瀚奏兩浙漕運近多
失期乞將東西把總二員合而爲一每歲更番一員領
運一員預備次年運務戶部覆浙江轉漕視別省倍加
繁劇兩總分任似難變更惟浙江都司僉書職事頗閒
宜委任一員賜之專 勅督理運務 上是之 工科
給事中吳時來請臨德二倉米充漕運之漂流者并補
造運船以濟轉輸 上從之 漕運總兵等官李廷竹
方思馬森張瀚等議裁革遮洋運糧把總而以所屬淮
安大河泗州三衛分屬江北淮安總高郵揚州二衛屬
江北揚州總長淮一衛屬中都總俱兌運南糧以在北

德州等九衛與江北淮安總所屬徐州歸德三衛俱併入山東一總兌運山東河南之糧德州九衛與臨清平山二衛撥運薊州倉糧旗軍行糧每名加增四斗徐州等三衛與山東各衛撥運京通天津倉糧旗軍行糧如故其山東把總每歲將京糧催至白河復督運至薊州使南軍無裹糧之苦而北衛得近地之便 巡按御史蔣機奏漕糧四百萬石除改折邊餉其入京通二倉者三百三十餘萬石而京倉僅二百萬根本之地出多入少非所以權輕重備緩急也自今請無拘三七四六之例凡兌運者悉入京倉改兌者入通倉從之 十月延綏撫臣王遴奏本鎮黃甫川運河已通漕粟見貯府各

縣倉乞頒降印記一顆責令本縣典史主之又運船水手臨河僱覓非經久之計請於葭州神木府谷吳堡米脂綏德等州縣均徭內增編比常役少加優異以恤其勞報如議 二年二月蔣機復條上四事 一漕運總兵官每歲九月漕舟過淮則以催督事付之叅將而身自赴京會議仍亟還漕艘不得停泊凍阻 一杭州嘉興湖州蘇州松江常州運解白糧必以府佐賢者任其事毋槩委之首領及驗發批單水程限簿勿令稽延又通行關津量免其稅 一戶部司官管理太倉銀庫者必滿歲方代且給關防以防詐偽 一咨工部管河郎中凡倉廩橋梁以時修葺使轉輸委積者無所患若石

壩普濟上平津三閘各增給舊運剝船十隻小脚四名以資盤費從之 四年二月御史楊家相陳三事 一重漕艘以全大計謂淺船造作不堅弊在法踈人玩侵牟者多宜嚴加綜核 一開河道以利漕輓謂朝陽門外故有河渠雖歲久漸湮尚可復之以便東倉之運與夫寶應河之議開康濟河鎮江一帶之議濬淺阻填卑窪者皆通漕孔道所宜亟舉 一建閘座以省耗費謂瓜州土壩剝運甚艱莫如建閘之便又境山諸閘日就頽毀宜及時修理 上命如議行 五月 詔漕運各總過江脚銀奇羨者解貯淮安府庫爲軍船置辦什物之用每船給以四兩如再有餘則以助修船之費仍著

爲令 九月御史唐鍊條上漕運事宜請令江西湖廣浙江各布政司管糧叅議督運船赴瓜儀與漕運委官交代後期者劾治降黜運軍數少令司道府衛於正丁舍餘屯操中僉補修船責成工部分司沿河催督宜專勅徐州兵備副使限四月終過洪入閘漕司比過淮例一體奏報 上命悉如議行 十一月戶部會廷臣議漕運便宜 在漕司條陳者四事 一曰清理厰總謂江西湖廣糧運常遲率同官旗挾貨所至耽延請令督糧藩佐嚴法禁革押至瓜儀付攢運郎中叅將再委府佐數員沿江催督其應天太平安慶池州寧國廣德州運務比兩浙例責成南直隸屯田御史賜以專 勅

兼攝之其原差主事但令專管江北 二曰鑄給關防
謂浙東等一十二總俱存輕齎減存等銀一切收支漫
無印記弊端不可勝詰請各給關防以杜姦偽凡陞遷
革職必交代明白方許離任 三曰查催民運謂杭嘉
湖蘇松常六府民運白糧宜令備載數目及解官船隻
申白漕司庶可給發幫牌責限運納而考其完欠之數
四曰申明勸典謂運官罪罰甚嚴而賞格未備胡以
示勸請令兵部查完多功次如例陞給超等擢用 在
戶部應議者九事 一平收納各倉收糧仍復一尖一
平之舊 二聯幫次運船令首尾聯絡依次而進使漂
流遲速便於稽查 三處掛欠官旗雖經叅治每籍口

新運輒自逃回今後移文漕司別委領運務嚴督舊官
盡法示懲 四催空船令把總押過天津叅將尾後督
令過淮各省專委都司官一員赴淮催還本衛 五處
空運昌密漕糧仍舊令各軍徑運待深夏抵灣起運以
省餽價 六防凍阻自今凡遇凍阻者不拘道路遠近
擇地寄貯留軍看守發船回南方補官旗以整新運舊
者必掣通關方許回衛 七議改折歲漕四百萬石今
後必十分災傷萬不得已者令附近州縣照例撥補或
臨德等倉所積堪抵支運方准議改毋以小災市恩致
損舊額 八速運期漕糧宜酌道里遠近尅定期若
兌完開幫責之監兌瓜儀責之僨運過淮責之漕司理

刑過洪責之徐州兵備八閘以後責之各管倉主事將經過日期即時登記懲治之條惟按時日久近爲差九稽運程糧船過淮之後請勅徐州兵備每歲三月前後詣清河桃源宿遷等處任劄選委府州縣佐貳分方查催漕司將過洪日期一體具疏得旨如議行五年六月巡倉御史唐鍊條奏漕運事宜一請申飭所司嚴立程限督催運船過淮以防凍阻一請復設京倉經歷五員通倉經歷一員以便責成一巡倉事畢宜如刷卷例將京通二倉正耗出納完欠之數一一查覈以清夙弊一軍官正兌例有完貼以助收兌乞量行議免以示優恤一旗軍多以乾沒浪費虧損糧額

貽累運官宜行巡按御史嚴提追究一白河沙谷等處淺近五里許而以轉搬厚費運軍不勝其苦宜令所司及時疏濬詔允行九月漕運都御史陳爝等會議漕政事宜一疏濬常鎮寧國及浙江海寧崇德等處河道仍開復練湖水以濟運河之用一給各省督糧道關防久任責成一查復江北揚州等三總耗米本色以抵軍士行糧其山東觀城等四縣於小灘鎮交兌者每石折耗米三升以充盤剝之費一清補每船缺軍務足原額十名之數凡行月二糧及鈔賞等項俱使得蒙實惠以安其心一見寄通庫羨餘銀兩及五年以後係二分給軍之數凡運奏到漂流及上年掛欠

者准與折算補納不足則行原籍徵補 一禁戢各處
土豪抑困兌軍者有司不能治以罷軟論 一嚴督淺
夫日伺河下助挽漕舟以免運軍僱募之苦 一廣德
州舊於水陽地方設倉軍民便之宜復其舊湖州府縣
地僻山阻宜徙置各倉於府城報可 十月唐鍊復奏
請嚴漕運漂流凍阻之罰漂流糧五千石以上凍阻船
五十隻以上俱送法司重處不得照常擬罪其漂流未
經奏聞者覆實具奏已奏聞者或將脚價扣償或將本
衛別幫及槩總二分給軍糧內通融買補不得輕議改
折仍於沿河擇閒曠地以寄凍阻之糧量留官旗守之
事畢之日趣令南還報可 十一月漕運都御史王宗

沐奏漕糧漂欠雖因河決亦多有貧軍侵耗鑿舟自沉
者宜先議優恤凡各運船輕齎銀兩在湖廣江西浙江
原議三六者改爲三三直隸江北江南原議二六者改
爲三四山東河南原議一六者改爲一五令有司各將
扣下米數給軍其各軍兌完起運之後責令五船聯爲
一甲中推一人有才力者爲甲長如一船有失五船同
坐廢人樂用力而漂損可漸少也從之 六年正月戶
部尚書張守直等條列漕政事宜 一申嚴議例言漕
糧徵兌納完各有例限頃以開兌後期及至淮之日漕
司不親查覈因循成弊今宜分別責成如糧船到淮後
期責在各處巡撫已到淮而更遲悞責在漕司並聽本

部會同科道官叅奏 一查處糧船言邇來造船者多
侵尅料價一遇風濤立致漂流宜行撫按及漕司查各
總淺船已回水次者責令委官嚴修及行各把總官驗
船豎桅酌量分派毋令重載易壞其有守凍未回者預
覓民船裝糧抵壩候凍船回日修理仍將委官查考叅
究 一查刷船軍言近來選僉運軍多以私意放免募
工充之稍遇危難卽棄不顧今宜查刷弊源諸殷實精
壯戶丁俱照額僉運不得以無賴濫充仍令五船編甲
互相覺察以懲奸弊 一議處漂流言糧米漂流原無
免耗之例此例一開各領運官旗多致侵盜往往自沉
其舟得照例開豁多方處補比照數上納者獲利數倍

人復何所創懲自後糧船漂流務將官旗先行擒治不
得輕扣各軍月糧務盡家產抵償令各倉監收主事以
漂流撈獲餘米別貯倉廩先行支放奏上得 旨如議
從實舉行 六年二月禮科雜遵條飭漕規五事 一
正運本言漕運大計統於都御史及總兵官今不能正
身率下而欲法度必行漕政肅清不可得也宜首清漕
庫令御史每歲稽查使出入明而物議息 一勵運官
言近來運官賢否採訪不真賞罰不當宜令漕司虛心
詢訪從公甄別先至者給賞陞擢遲阻者盡法究治
一撫運軍言領運旗軍行糧月糧既不以時發而輕齎
羨餘往往不沾實惠以故迫於貧困展轉爲奸直錄其

勤勞繩以奸狡漂沒者厚加撫恤 一足運船言運船之弊大率敢于乾沒者缺而不補巧於侵漁者補而不堅漂損之原實由於此宜暫僱船隻裝載新糧仍發銀督造以足原額并增給修船銀兩歲一清查卽不如數及有他弊者並寘之法 一嚴運期言邇來漕規廢壞人心玩愒督責之法未備宜令督糧道押送入閘方許回任各兵備沿途催僱嚴立程限御史郎中等沿河上下往來督發其凍阻遲悞及妄稱漂流者各別分議處毋令得生奸議 詔允行之

今上萬曆二十七年九月直隸巡按李光輝上漕政五事 一扣斛月糧以濟實用將各衛所運官原收解通庫月糧銀俱類解通州俟起糧完日赴該州驗收庶月糧不至花費而軍旗有實用 一議復改造以甦軍苦應造之船自改隸南京工部分司諸色煩費不下二四千金今宜盡送淮安清江分司照舊如式成造其不應造者停泊儀真新運單到運官卽責各旗在彼修船赴兌庶船隻得以早完而旗軍不至賠累 一議改就兌以便起運夫軍船由瓜州出閘涉百四十里長江之險有風逆愆期之病有賊船劫奪之病有冒險履危之病今查原兌水次離太州四十里亦有小河剝運可通合行漕司改于太州出兌倘港河淺溢務令撈濬通利庶旗軍領兌甚便而太州交兌亦無大苦 一早濬內河以

利速運京口俱在十二月開開挑河在隆冬人夫不肯盡力故歲費帑金而歲歲仍淺今宜於九月興工所起土泥悉令遠置庶運道疏通而漕儲無悞 一更派兌以免民累九江雖屬直隸而衛治則列在江西界中頻年撥兌寧國池州安慶三府屬南陵建德清陽銅陵望江等縣糧米百爾艱難合行漕司將新安衛船隻歲撥六十二隻派兌寧池等府九江衛原兌寧池等府船隻改派江西各互換領兌庶運不遠涉而官民免守候之苦 上從之 二十八年八月巡漕俱陳漕政五事 一議水次併幫以便責成原定運糧一州一縣止許于一衛交兌兌支不盡方許兌于別衛不許將一州一

縣分作三四衛亦不許將一衛分作三四州縣及以遠派近以近派遠今不照例咸稱不便宜循故事庶無顧此失彼之患 一議處漕船以便新運漕船係轉輸首務今軍衛有司等官或以料銀缺乏爲辭或以底板不到爲諉耽延誤運殊非法紀今宜嚴催料銀勒限補造每年運糧過淮之日各該把總通將見運及存衛船數呈送查核料理新運 一申飭科欵常例漕運總兵官專一咨訪總運各官科欵旗軍情弊不許徇情容縱 一申飭押空糧船漕運儲道選完糧才力指揮一二員填寫長坐委令隨幫押回有間道潛歸及在途貿易爲非者卽以棄運私逃事例坐之 一申飭行月二糧前

續文獻通考 卷之三百八 漕運河道
項糧銀除扣留解幫入標外其餘并一應錢糧務候船到盡數給領倘一時正餉不全卽于庫貯別項錢糧嚴行借給 上從之

漕運河道

太祖洪武都金陵則漕於江其餉遼卒猶漕於海自永樂都燕後歲漕東南四百萬石由江涉高寶諸湖絕淮入河經會通河出衛河白河遡大通河以達於 京師諸洪泉壩閘以次修舉至於今纖悉具備故並載焉

成祖永樂九年春二月命工部尚書宋禮等往濬會通河是河元所始也元初事海運後因壽張尹韓仲暉獻議於至元二十六年興工起東平州安民山西南道

西北二百五十里抵臨清引汶絕濟直屬御河卽令衛河建閘三十有一以節蓄洩遂名會通河我 朝永樂初轉輸贍北海險陸費耗溺不貲至是濟寧州同知潘叔正建言遂命禮等發山東徐州等處丁夫十六萬五千挑濬之初元人遏汶分流北出陽谷以通衛水南出濟寧以通泗水然分水之處地勢猶高僅勝小舟時有老人白英建議築戴村壩以遏汶導之西南流四十里鵞河口盡入南旺湖地勢稍下然後分流南北可勝巨載禮然之遂壩于汶上縣之戴村橫亘五里導汶水東北流盡出南旺湖至分水龍王廟始分爲二先是禮等從分水廟度北至臨清地降九十尺南至沽頭地降一

百十有六尺遂卽分水處均導之南得四分以接於徐
沛北得六分以達於臨清又循地勢高下增修水閘以
時啓閉便蓄洩北至臨清爲閘凡十有七而達漳衛南
至沽頭爲閘凡二十有一而達河淮是年冬河成役凡
九越月

大通河

大通河卽潞河舊爲通惠河其原出昌平州白浮村神
山泉過榆河會一畝馬眼諸泉滙爲七里灤東貫都城
由大通橋而東五十里至通州高麗莊入白河長一百
六十餘里元初所鑿賜名通惠每十里爲一閘蓄水通
舟以免漕運陸輓之勞 國朝永樂以來諸閘猶存

若仍設官夫守視然不以轉漕河流漸淤成化正德間
累命疏之功不果就嘉靖六年遣漕運總兵錦衣衛
都指揮及御史會濬之自大通橋起至通州石壩四十
里地勢高下四丈中間設慶豐等五閘以蓄水每閘各
設官吏共編夫一百八十名每名工食銀八兩造剝船三百隻
每隻價銀三十五兩分置各閘責經紀領之使製布囊盛米僱役
遍相轉輸以達都下軍民稱便蓋元郭守敬嘗行之而
弗果至我 國家決策修復爲萬世利

漳河

萬曆中科臣王德完奏漳河水患蔓延故道宜復其變
有二其患亦有二其策則有三二變者何蓋漳水經臨

漳三臺口廻龍鎮及大名南關至小灘入衛濟畢漳之故道也一變于十七年則河決小屯東經魏縣元城抵館陶入衛其害小再變于二十五年則河決高家東呂彪河合流經廣平肥鄉永年至高周入洺水同流至青縣口方入運河其害大所謂二患者何蓋洺水不勝漳而今納漳則狹小不足收束巨浸病溢而患在民衛水昔仰漳而今舍漳則細緩不能掃捲沙泥病涸而患在運所謂三策者何一塞高家河口導入小屯河費少利多爲上策一仍廻龍鎮至小灘入衛費巨害小爲中策一築呂彪河口岸隄障水固不資利亦不罹害爲下策此漳河徙治之大較也

白河

白河南去通州二百里其原出胡地經密雲縣合大通榆渾諸河凡三百六十里至直沽會衛河入海源遠流迅河皆溜沙每夏秋暴漲最易衝決每決輒發丁夫修築屢築屢決正統三年命官相視地勢自河西務經二十里改鑿順下河遂安流每淤淺處設鋪舍置夫甲專管挑濬舟過則招呼使避淺而行嘉靖中霍韜建議通河源出河南輝縣之蘇門山東北流會淇漳諸水過臨漳分爲二其一北出經大名至武邑以入滹沱其一東流經大名東北出臨清合汶水至直沽會白河入海長二千餘里今爲運河自臨清至直沽凡五衛十七州

縣淺一百五十七處初衡水臨清之境去海尚遠兩岸亦高未見衝決自德州而下漸與海近河狹地卑衝決甚易滄州以下水發易盈衝決益易每決輒發丁夫修治嘉靖十三年議准恩縣東光滄州興濟四處各建減水閘一座以洩漲溢之水若於入海故道再加修濬深廣其利永矣

汶河

汶河之源一出新泰縣官山之下曰小汶河一出泰安州仙臺嶺一出萊蕪縣原山一出縣寨子村俱至州之靜封鎮合流曰大汶河出徂徠山之陽而小汶來會經寧陽縣北埧城至汶上東平東阿又東北流入海元於

埧城之左築壩遏汶入泲南流至濟寧合沂泗二水以達于淮自永樂間築戴村壩汶水盡出南旺於是泲沂泗自會濟而汶不復通泲今沂州亦有汶河一出蒙山東澗谷一出沂水縣南山谷俱入邳州淮河 再按汶水源入南旺湖幾三百里皆淤沙深廣春夏亢陽久沙則乾燥水多滲入沙底况所經既遠安得不微或遂謂汶泉水微殆未深考其故矣第數百里之淤沙不可盡濬濬則復淤勞費不已嘉靖甲午都御史劉天和往治運河因得其詳時有獻開河置壩之議欲視水微盛權宜啓閉以避沙滲亦一策也

詳見後劉天和議中

按汶水東北入海以人力遏轉濟漕非其性然也成化

續文獻通考 卷之三十六
以後戴村壩以下河淤塞平滿故水易漲溢卽此下東平故道鹽河入海運河不得其用瀕年挑濬頗勞費衆議河岸築堤以約攔之猶慮水漲堤壞迺議置減水閘滾水壩各四以洩洪水至嘉靖十三年秋主事段承恩築東堤歎高厚十四年主事顧翀築西堤去河遠而高厚運道永賴議者曰運河命脉全賴茲流雖勺水當惜任事之臣必再深考焉

洸河

洸河乃汶水之支流出寧陽縣北三十里堽城西南流又循縣南流三十里會寧陽諸泉又六十里經濟寧城東與泗合出天井閘河

沂河

沂河原出曲阜縣尼山西南分流爲二一西流至金口壩上卽與泗會一南流亦與泗會出堽里河又有出沂水縣艾山者會蒙陰沂水諸泉與沂山之汶合流至邳州入淮

泗河

泗河原出泗水縣陪尾山四泉並發西流至兗州府城東又南流經橫河與沂水合元時於兗州東門外五里金口作壩建閘遏泗之南趨國朝因而修築每夏秋水長則啓閘放使南流會沂水由堽里河出師家莊閘冬春水微則閉閘令由黑風口東經兗城入濟又南流

會泚水至濟寧出天井閘

濟河

濟河出王屋山至河南濟源縣二源合流其水或伏或見東出於陶丘北又東北會于汶今在汶上縣北一名大清河元人作金口壩傍有河即黑風口西通濟流並入會通河

沁河

沁河出山西泗源縣綿山東谷由太行山麓至河南原武縣黑陽山與河汴合流至徐州入運河以濟徐呂二洪每年水勢淺深尺寸管洪官按季奏報前代嘗引沁以通衛正統以前其支流猶自武陟山原村東北由紅

荆口經衛輝凡六十里與衛通天順七年河趨陳穎入淮乃開沁以達徐復引河以合泗而入衛之故道始湮劉天和問水集有云將導沁入衛衛輝宗藩已因水患奏塞上流矣且臨清下至天津河道甚狹瀕年已苦衝決不可復益以水遇乾則微滙水諸湖以淤而狹若於武陟境內沁水橫建滾水石壩於東岸開三斗門引沁自原武陽武北界大堤之外經延津循大堤而東至長垣界入黃河舊衝張秋故道又東至曹州境舊分水處黃河舊於此分流一大支徑衝張秋一小支下濟寧永通閘月口北向張秋之道別設一閘張秋以下水涸則沁水盡東全濟運河澇則半由滾水壩仍歸黃河是

運河復增一汶為永遠無窮之利黃河亦可少殺矣而沁則易於節制不亦大愈於引黃河耶

按胡氏世寧議欲因沁引河入衛今以天和之議叅之引河有三難防 宗藩一也臨清下至天津河身狹難受二也河性流移或導之衝淤會通三也似天和所言差強

南陽新河

新河在昭陽湖之東起南陽至留城一百四十一里八十八步嘉靖六年以河決 命官開濬垂成而止 四十四年復決乃因舊跡疏鑿又起留成至境山濬復舊河五十三里凡役夫九萬一千有奇八閱月而成

元年山水衝決復淤新河之三河口 薛河沙河趕牛溝會此故名 乃

經理沙薛上流各開支流築黃家口多裏溝等壩引薛河由呂孟湖出地浜溝築宋家壩引沙河由尹家湖出鮎魚口築黃甫壩引沙河由滿家湖入南陽河次年工成又為三河口石壩一座南陽湖石堤三十餘里凡建閘九築壩十三減水閘二十開支河九十六里三年又於昭陽湖以東沙薛二水所從入舊河處開鴻溝廢渠達李家口回回墓而東出留城閘計六十餘里積水俱有宣洩勝沛利之

黃河濟運

黃河發源詳載元史其流合陝西山西諸水而始大至

河南始散漫泛溢至山東勢益峻急衝決無常。洪武二十四年決原武淤安山。正統十三年河溢滎陽縣。自開封府城北經曹濮二州陽穀縣以入運河至兗州府沙灣之東決大洪口諸水從之入海。景泰四年命官塞之乃更作九堰八閘以制水勢復於開封府金龍口即荊隆口筒瓦廂等處開渠二十里引河水東北入運河。弘治二年復決金龍口東北至張秋鎮入運河而紅荊口并陳留通許二縣俱淤淺。命官治之。五年復決未幾又決張秋運河水從以入海運舟甚艱。命內臣及文武官往治發丁夫數萬於黃陵岡南濬賈魯河一帶分殺水勢下由梁靖口至丁家道口會黃河出

徐州流入運河又從黃河南濬孫家渡口別開新河一道導水南行由中牟至潁州東入於淮又濬四府營淤河由陳留縣至歸德州分爲二派一由宿遷縣小河口一由亳縣渦河會於淮又從黃陵岡至楊家口築壩堰十餘并築大名府三尖口等處長堤二百餘里及修南岸于家店筒瓦廂等處堤一百六十里始塞張秋決口更名曰安平鎮又於河東置減水石壩分五洞以洩水勢令管河官隨時修理。正德四年溢皮狐營決曹縣之溫家口馮家口等處又北徙至儀封縣小宋集而決衝黃陵岡埽壩溢入賈魯河敗張家口等處縷水小堤循運河大堤東南行而賈魯河下流淤塞亦出張家口

合而南注遂決楊家口道曹單二縣城下直趨豐沛
命官塞之 十二年溢武城縣壞城郭田廬 命官修
濬 嘉靖五年上流驟溢東北至沛縣廟道口截運河
注鷄鳴臺口入昭陽湖汶泗南下之水從而東而河之
出飛雲橋者漫而北泥沙填淤亘數十里管河官力濬
之僅通舟楫 六年復塞老和尚寺八里屯張家莊等
處 命官發丁夫數萬于昭陽湖東北起汪家口南抵
留城口改鑿新河以避黃河衝塞之患尋以災異罷役
命官卽故道濬之修築單縣林臺至沛縣舊城隄百
四十餘里以塞入湖之道又濬趙皮寨孫家渡口殺上
流之勢沛漕復通 九年自沛北徙橫流金鄉魚臺出

穀亭口 命官濬趙皮寨抵寧陵故道及築睢州張見
口至歸德州長隄百餘里以禦泛漲尋以河流改遷罷
役十四年築岔河口縷水堤一道長三里又於曹縣八
里灣抵單縣侯家林築長堤八十里 六十年鑿地丘
店野鷄岡等上流支河四十餘里 十九年濬睢州孫
繼口至丁家道口淤河五十里 二十一年又鑿野鷄
岡上流李景高等口支河三導河東注以濟二洪 二
十四年由野鷄岡決而南至泗州合而入海遂溢蒙城
五河臨淮等縣 二十五年又決曹縣溢入武城金鄉
魚臺單縣漂溺甚衆 命總理河道御史會同南北直
隸山東河南撫按官議築曹縣等處不果 三十一年

又決房村至曲頭集凡決四處淤四十餘里 命官濬
之役夫五萬餘三閱月而成 三十七年淤新集趨段
家口析爲六支入運河又由碭山趨郭貫樓析爲五支
出小浮橋會徐州洪 四十四年郭貫樓淤遂決華山
出飛雲橋截沛以入昭陽湖北泛胡陵城孟陽泊至穀
亭南溢於徐 命官往治乃接六年所鑿故跡役夫濬
之爲南陽新河又疏舊河自留城至境山又堤馬家橋
遏河流之出飛雲橋者使盡歸秦溝魚沛橫流始絕惟
茶城時有淺阻 隆慶四年又決邳州注睢寧出小河
口自曹家口至直河淤百餘里 命官濬之復故渠蓋
塞諸決口六年築堤自徐沛至宿遷三百七十里 萬

曆元年茶城復淤修建境山閘并護房村等處堤岸又
築遙堤四開草灣導河自安東縣至金城五港入海然
汎濫如故曹豐徐沛之間隨塞隨決 五年秦溝復淤
自崔家口歷北陳鴈門集等處至九里山出小浮橋其
一支自九里溝誼安山歷符離出小河口而崔鎮大決
散漫湖泊間桃源以下故渠多淺 六年 命官修治
乃議塞崔鎮口因築遙堤束水衝沙其南岸自三山頭
至李字舖長二萬八千五百五十八丈又自歸仁集築
橫堤至孫家灣長七千六百八十餘丈又於桃源縣馬
廠坡築堤長七百四十丈以遏南奔入淮之勢其北岸
自谷山至直河長九千四百六十四丈又自古城至清

河長一萬八千四百十丈建崔鎮等滾水石壩四座以緩泛溢之水使不能潰堤而出河流始安

宋濂籌黃河有曰比歲河決不治以中原之地平曠夷衍無洞庭彭蠡以爲之滙故河常橫潰爲患非多爲之委以殺其流未可以力勝也自禹治水之後無水患者幾三千八百餘年以大伾而下醜爲二渠至于大陸播爲九河入於渤海蓋河之流分其勢自平也自漢至唐平決不常宋時又南決南渡之後遂由彭城合汴泗東南以入淮向之故道又失矣夫以數千里湍悍難制之河而欲使一淮以疏其怒勢萬萬無此理也方今破金堤踰曹鄆地幾千里悉爲巨浸民生墊溺比古尤甚莫

若浚入舊淮河使其水南流復於故道然後導入新濟河分其半使之北流以殺其力則河之患可平矣

張元禎貽副使張鶴書曰聞今黃河以北多存河流舊身則上下湮沒已久若因其舊開數支河以達平原及直沽等處一可以殺直奔安平之勢一可以引資灌溉如此將不惟河無患而北方旱溢之災可常免矣

白昂治河建議言河自南入淮非正道恐不能容乃欲復自魚臺縣歷德州至吳橋修古河堤自東平州北至濟興鑿小河十二道引水入大清河及古黃河以入海河口各作石堰相水盈縮以時啟閉事竟寢

工部侍郎蘭芳謂永樂中發丁夫十萬於中灣下二十

里開濬舊黃河分導河流使由故道北入於海河南之民免於魚鱉後中灣河復淤

霍韜議處黃河云按元人漕舟涉江入淮至於封丘陸運一百八十里至於淇門入於御河達於京師御河卽今之汲縣衛河也今由河陰原武孟津懷慶之間擇地形便道河水注於衛河東春水平漕舟由江入淮沂流至於衛河沿臨清滄州至於天津夏秋水迅仍由徐沛達於臨清至於天津是一舉兩得之道也開一衛河可殺徐沛上流之患可免鳳陽州邑潰溢之虞可得運舟兼濟之利有如此

劉天和曰通州上達 都城近已修閘轉般漕運脚費

大省爲萬世利無容議矣若白河經密雲諸山且全受渾榆諸河之水夏秋暴漲隄防不能禦源遠流迅水勢漫散河皆溜沙深淺通塞不常運行甚艱殊無策以治之惟用堯杓數千具治河官夫遇淺卽濬此外運舟各携四五具二三百舟卽可得千餘具合力以濬頃刻而通盤剝大省矣惟運卒利於盤剝方可開支脚價如卽以盤剝之費償運卒濬淺之勞則運卒受實惠不愈利歸剝船耶兼官置剝船千艘糧運不滯矣近有議於白河建閘者河廣水盛漲必有決底皆淤沙閘必易損且河徙無定閘難改移蓋未達水土之宜也運河數千里惟白河隄防大壞歷觀河底兩岸率皆淤沙以故易於

續文獻通考 卷之三十八 二十六
衝決遷改治隄宜遠宜堅宜植土柳衛合淇漳諸水故其流盛臨清而下去海猶遠而岸亦高衝決猶少德州而下河身既狹去海漸近兩岸復卑滄州以下尤卑易盈易決矣近恩縣東光滄州興濟連建四閘誠足以洩漲溢之水但入海之道須修濬深廣無隳成功也滄德天津之間河決無歲無之亦有水不甚盛河不甚盈而決者非盡由隄岸卑薄也一則鹽徒盜決以圖行舟私販一則鱗薄地土盜決以圖淤肥一則對河軍民盜決以免衝決彼岸巡守當嚴而防察當預也臨清板閘運河入衛處也衛河水漲卽壅入閘或漫閘面以入故閘上下常淤運舟每爲停阻宜增培閘面旱澇俱須下板

啟閉蓋啟則閘下之淤每日衝洗可盡閉則衛水不入閘河之水積盈及啟則二河水勢相當淤亦不入矣元人遏汶分流北出陽穀以通衛南出濟寧以通泗名會通河然分水之處地勢猶高僅勝小舟永樂九年宋司空禮築戴村壩以遏汶導之西南流四十里出鷺河口南旺湖中地勢下矣然後分流南北方可勝巨載漕運永利焉夫人知宋導汶濬河之功而不考其故爲著于此汶水出泰萊諸山伏秋流亦混濁率皆虛浮淤沙直至南旺河皆平滿故水易漲溢頻年挑濬沙積兩岸風起飛颺仍歸河內運河命脉全賴茲流雖勺水當惜衆議兩岸築堤以約欄之又議開減水閘滾水壩各四以


洩暴水嘉靖十三年秋築東堤尚須培補高厚十四年
秋築西堤去河遠而高厚閘壩亦計料修建嗣而治之
運道永賴矣又汶水自秦萊至南旺幾三百里咸謂汶
泉水微蓋盈河淤沙深廣春夏亢旱沙極乾燥汶水經
之多滲入河底所經既遠安得不微耶有獻議者云汶
水自春城口以下河流迂遠宜於春城口置石壩一道
中爲數礅洞創開小河八里餘取徑入魯姑龍關二泉
渠量加濬廣凡六十三里餘而至黑馬溝伏秋水盛流
濁則閉礅洞俾由故道春夏之間及天旱水微流清則
遏水由礅洞下出馬溝口即可避汶河百數十里之沙
滲余大奇之隨因中道五泉隔絕不能入遂止如將五

泉者橫汶開溝以入亦無不可自徐州北至臨清七百
里間爲閘四十有三自元建者二十餘 聖朝永樂至
今先後增建者二十有餘故閘面閘底高下不一黃河
南徙諸閘有僅露閘面者有沒入泥底者惟棗林閘露
閘面三尺南陽已沒入泥底閘面泥淤仍四尺六寸八
里灣閘面泥淤仍五尺宜悉培而平之以時啟閉仍各
測其深淺其閘底過深者則量留底板均止以十二板
啟閉則閘上之水益深苟非久旱水微固可直達上閘
舟行其永利矣南旺迤北諸閘亦可行之而大勞甫息
未遑也閘河自魯橋以下爲黃河衝洗以漸而廣乙未
濬河止以底廣五丈爲準蓋南旺上源也分水處河底

續文獻通考 卷之三十一
僅四丈下流愈廣則愈淺矣開河僅取通舟非務爲觀
美元人有因水散至以板爲岸逼水行舟可驗也嘗聞
之先輩兩閘之間須留稍淺一處蓋中道皆深下閘一
開上閘之水盡洩閘近者積水猶易盈閘遠者倍費時
日矣故中道留淺船行至此雖少待然積水不必盈閘
即可越之而直達上閘舟行速矣

今上萬曆二十九年四月工部覆河道尚書劉東星本有
曰河淮交變北遏茶城南侵 陵寢故議開黃家嘴分
殺下流以導其去復因黃堍口決至九十餘里工不可
必費不可繼故議開趙家圈三仙臺等處疏淪上流以
道其來今值天道亢旱經歲不雨原頭旣微來流日少

此濁河之殺旋挑旋淤非人力之未至實水性之不可
強爲耳惟徐邳一帶運道咽喉目今糧船淺阻關係匪
細相應移咨總河衙門及各官作速踏勘趙家圈三仙
臺李言口上流不及有無旁潰果否壅塞應否開濬或
另尋別道引水潤漕以救目前之急今加河工程旣有
次第一百添夫并力速成務期克濟



三

大業一而悉夫并衣表如絲膜衣襖

又尋保道侍木團曾以妹日前之息今賦何工或地亦

臺李言口土亦不父有孫安當果否筆悉懸各開漸近

聯時與孫各縣何衙門及各官并密御時故家園三所

...

...

